

## **Lei 4/1987, do 27 de maio, de creación da Escola Galega de Administración Pública**

### Tramitación parlamentaria:

Proxecto de lei, BOPG núm. 47, do 15.9.1986.

Emendas, BOPG núm. 64, 14.10.1986.

Debate de totalidade, DSPG núm. 34, do 2.12.1986.

Informe da Ponencia, BOPG núm. 119, do 16.3.1987.

Dictame da Comisión, BOPG núm. 128, do 13.4.1987.

Mantemento de emendas e votos particulares, BOPG núm. 128, do 13.4.1987.

Debate e aprobación polo Pleno, DSPG núm. 51, do 28.4.1987.

### Publicación:

*Boletín Oficial do Parlamento de Galicia* núm. 143, do 16.5.1987.

*Diario Oficial de Galicia* núm. 103, do 2.6.1987.

*Boletín Oficial del Estado* núm. 173, do 21.7.1987.

## **Lei 4/1987, do 27 de maio, de creación da Escola Galega de Administración Pública**

Pola Lei 10/1989 foron modificados os artigos 3 e 7.

A necesidade de contar cun persoal adecuado para dar satisfacción ás demandas sociais que se lles formulan ás Administracións Públicas en cada momento histórico, obriga a estas a coida-la súa selección e formación entendida no senso máis amplo da palabra.

Esta formación vai dirixida a acadar unha maior profesionalización do seu persoal que redunde nunha maior eficacia na prestación dos servicios públicos.

A Xunta de Galicia creou polo Decreto 163/1982, do 1 de decembro, a E.G.A.P., co carácter de órgano administrativo sen personalidade xurídica propia, que veu desenvolvendo actividades de formación do persoal.

O volume da actividade da Escola aconsella a creación da E.G.A.P. como entidade autónoma da Xunta de Galicia que, adscrita á Consellería da Presidencia, será o órgano encargado da formación do persoal ó servizo da Administración Pública galega.

Como a formación depende do modelo de Función Pública que se deseñe e do proceso selectivo que

se implante —e, polo tanto, do contido e momento de impartición—, esta Lei regula con flexibilidade os fins, a estrutura organizativa básica e as fontes de financiamento, e permite, pola vía de convenios, establecer pontes de colaboración con outras institucións públicas ou privadas.

A necesidade de creación desta Escola vén motivada ademais pola conveniencia de incardinala Administración Autonómica no entorno histórico, lingüístico, político e cultural de Galicia.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de Galicia e co artigo 24 da Lei 1/1983, do 22 de febreiro, reguladora da Xunta e do seu Presidente, promulgo, en nome de El-Rei, a Lei de Creación da Escola Galega de Administración Pública.

### **Artigo 1**

1. A Escola Galega de Administración Pública (E.G.A.P.) créase como organismo autónomo de carácter administrativo, adscrito organicamente á Consellería da Presidencia.

2. A Escola Galega de Administración Pública (E.G.A.P.) é unha entidade de Dereito Público con personalidade xurídica e patrimonio de seu que actúa con plena autonomía funcional para o cumprimento dos seus fins, e rexerese pola normativa autonómica que lle sexa de aplicación e pola reguladora das entidades autónomas.

#### Artigo 2

A Escola Galega de Administración Pública terá a súa sede en Santiago de Compostela e poderá crear delegacións e centros de estudos especializados así como desenvolver actividades noutras localidades de Galicia.

#### Artigo 3

Os fins da E.G.A.P. son os seguintes:

1.— A realización de cursos de selección, formación e perfeccionamento do persoal ó servizo da Administración Pública da Comunidade Autónoma.

2.— A investigación e o estudo, e tamén a realización de traballos de divulgación en materia de Administración Pública, promovendo a súa máxima difusión.

3.— O establecemento de convenios e a celebración de intercambios con organismos semellantes das Administracións Públicas, a nivel nacional e internacional.

4.— A asistencia e apoio técnico con carácter voluntario ás entida-

des locais, establecendo para o efecto convenios ou relacións de colaboración e cooperación administrativa necesarias para o ensino, difusión ou aplicación de temas de interese para a Administración Local.

5.— A difusión e normalización do idioma galego na Administración Pública, a capacitación lingüística do persoal e a participación na fixación da linguaxe técnica, administrativa e xurídica galega.

6.— Calquera outro de natureza análoga e os que por lei lle sexan asignados.<sup>(1)</sup>

#### Artigo 4

As institucións e órganos da Comunidade Autónoma de Galicia poderán requirir da E.G.A.P. asesoramento ou dictame para o mellor cumprimento das súas funcións en relación cos fins enumerados no artigo anterior.

#### Artigo 5

Os órganos de goberno e administración da E.G.A.P. son:

1.— O Consello Rector.

2.— O Director.

#### Artigo 6

O Consello Rector ten atribuídas as seguintes facultades:

---

(1) Reprodúcese a versión orixinaria. O artigo 3 foi modificado polo artigo único da Lei 10/1989.

1.— Aproba-lo anteproxecto do presuposto anual da Escola e as súas contas.

2.— Aproba-lo plan anual de actividades, o plan de estudos e a memoria da Escola.

3.— Da-la conformidade ós proxectos de convenios con centros semellantes doutras Administracións Públicas e institucións.

4.— Propoñe-la organización administrativa da Escola e o seu correspondente cadro de persoal.

5.— Propoñe-los programas comúns para o ingreso na Administración Pública galega e emitir informe sobre os programas específicos de selección de persoal ó servizo da mesma, de conformidade coa normativa aplicable en cada caso.

6.— Establece-las bases e condicións xerais de participación e acceso ós cursos ou actividades que convoque a E.G.A.P.

7.— Elaborar e aproba-lo Regulamento interno da E.G.A.P.

8.— Coñece-los asuntos que pola súa relevancia lle sexan sometidos polo Presidente do Consello ou o Director da E.G.A.P.

#### Artigo 7

O Consello Rector da E.G.A.P. estará constituído do seguinte xeito:

1.— Presidente: O Conselleiro da Presidencia ou persoa en quen delegue.

2.— Vicepresidente: O Director da E.G.A.P.

3.— Vocais:

a) O Director Xeral da Función Pública.

b) Catro representantes da Xunta de Galicia, que serán designados pola mesma entre quen ostente a categoría de Director Xeral.

c) Un representante da Universidade de Galicia.

d) Catro representantes das Deputacións Provinciais de Galicia, un por cada unha das respectivas Corporacións.

A súa renovación terá lugar cada vez que se celebren eleccións locais xerais.

e) Tres representantes dos funcionarios ó servizo da Administración Autonómica galega.

f) Tres representantes dos funcionarios das Corporacións Locais, dos que un terá que posuí-la habilitación de carácter nacional.

g) Dous representantes do profesorado da Escola.

4.— O mandato dos Vocais que non o sexan por razón do seu cargo terá unha duración de catro anos, e de se da-lo suposto da revocación dalgún deles antes de finaliza-lo devandito período, o seu substituto será nomeado polo tempo que reste.

5.— O procedemento para a designación dos Vocais a que se

refire o número anterior será determinado por decreto da Xunta de Galicia.

6.— Como Secretario do Consello Rector actuará o Secretario Xeral da Escola.<sup>(2)</sup>

#### Artigo 8

1. O funcionamento do Consello Rector axustarase ó que dispón a Lei de Procedemento Administrativo no Capítulo II do seu Título I, sobre órganos colexiados.

2. O Secretario, sen voz nin voto no Consello, redactará e custodiará as actas.

3. O Consello Rector reunirse, alomenos, unha vez ó trimestre e, de tódolos xeitos, sempre que sexa convocado polo Presidente ou a petición dunha cuarta parte dos seus membros.

4. A Orde do Día das sesións do Consello Rector será fixada polo seu Presidente tendo en conta as peticións formuladas ó respecto polos demais membros.

#### Artigo 9

Son competencias do Director da E.G.A.P.:

1.— Ostenta-la representación ordinaria da Escola.

2.— Preparar e executa-los acordos do Consello Rector.

3.— Dirixi-los servicios e exerce-la xefatura do persoal da Escola.

4.— Exerce-la xestión presupostaria da Escola, dispoñendo os gastos e proponendo a ordenación dos pagamentos.

5.— Elabora-lo anteproxecto do presuposto anual da Escola, para sometelo á aprobación do Consello Rector.

6.— Propoñerlle ó Consello Rector o plan anual de actividades.

7.— Prepara-la memoria de actividades da Escola, para o seu sometemento ó Consello Rector.

8.— Coordena-lo desenvolvemento das actividades da Escola.

9.— Expedir diplomas e certificados acreditativos dos estudos realizados na Escola.

10.— Dirixir, impulsar e supervisa-lo cumprimento dos fins e actividades da Escola.

#### Artigo 10

O Director da E.G.A.P. terá categoría de Director Xeral e será nomeado pola Xunta a proposta do Conselleiro da Presidencia entre persoas con acreditados coñecementos e experiencia na Administración Pública de Galicia.

#### Artigo 11

1. O cadro do persoal da Escola será cuberto con funcionarios de carreira destinados na Comunidade Autónoma de Galicia ou en calquera outra Administración Pública.

---

(2) Reprodúcese a versión orixinaria. O artigo 7 foi modificado polo artigo único da Lei 10/1989.

2. Os profesores da Escola que non ostenten a condición de funcionarios de carreira que os habilite para o desenvolvemento de tal función terán a condición de colaboradores temporais e dereito a percibir as compensacións económicas que cumpran por asistencia, horas lectivas, conferencias, seminarios ou traballos determinados.

3. A Escola poderá encargar traballos de investigación para o mellor cumprimento dos seus fins logo da correspondente convocatoria pública.

## Artigo 12

Para o cumprimento dos seus fins, a E.G.A.P. dispoñerá dos seguintes medios económicos:

1.— Recursos ordinarios:

1.1.— As cantidades que se lle asignen nos Presupostos Xerais da Comunidade Autónoma.

1.2.— Os bens e os valores que constitúen o seu propio patrimonio e os rendementos deste.

2.— Recursos extraordinarios:

2.1.— As subvencións oficiais e os donativos ou aportacións voluntarias de entidades ou particulares.

2.2.— As contraprestacións

económicas que xeren os convenios que celebre e as actividades da Escola.

2.3.— Os ingresos que obteña polas súas publicacións.

## Disposición adicional

Sen prexuício do seu valor na Comunidade Autónoma Galega promoverase o recoñecemento dos diplomas outorgados pola Escola perante o resto das Administracións Públicas.

## Disposición derradeira

Facúltase á Xunta de Galicia para dictar no prazo dos catro meses seguintes á entrada en vigor desta Lei as disposicións que fosen precisas para o seu desenvolvemento e cumprimento.

Santiago de Compostela, 27 de maio de 1987

Xerardo Fernández Albor  
Presidente